

que des delices en fon chemin. Montre nous feulement tes playes, adiouftent-ils au Pere; elles nous difent plus efficacement que tu ne pourras faire, quand tu fçauras entierement parler de noftre langue, que nous deuons feruir & adorer celuy, dont tu attends vn iour qu'il te rendra & la vie que tu as expofée fi franchement pour luy, & les doigts qu'on t'a brulé fi cruellement, [76] enuoyant icy pour fon feruice. C'est ainfi que la prouidence de Dieu tire fa gloire de nos pertes, & que la foy de ces bons Neophytes va s'affermiffant de foy-mefme, trouuant de iour en iour de nouveaux motifs de croire les veritez que nous venons leur annoncer.

René Tfondihouanne, parlant vn iour du tres-saint Sacrement en vne affemblée de Chreftiens; oüy, mes freres, leur difoit-il; croyons fans aucun doute que Iefus-Chrift eft en l'Hostie, qu'il eft proche de nous, & dedans nous, lors que nous Communions. Il s'eft voulu cacher, comme vn enfant nouvellement conceu dans le ventre de fa mere: Si la mere ne croyoit pas que fon enfant euft vie, lors qu'il eft caché à fes yeux, & qu'elle euft trop de curiosité pour le voir auant terme, iamais elle ne le pourroit voir que mort, & fe feroit mourir foy-mefme: Ainfi quiconque refufera de croire que Iefus-Chrift eft en l'Hostie, s'il ne le void; iamais ne meritera de le voir. Attendons que luy mefme veille fe decouurer; & alors nous l'enuifagerons avec autant de ioye, qu'une mere void fon enfant, dont elle a patiemment attendu les momens, fans les precipiter.

[77] Cette penfée me furprit beaucoup, l'entendant de la bouche de ce bon Chreftien: mais ce qui m'eftonne le plus, & ce qui me feroit incroyable, fi ie